



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

BJP yimsüsüba ya Adolf Hitler
yimsüsüba den tamajungba: Mamata

Mehbooba Mufti-i
Assam CM Sarma aitsü



VOL. XIX NO. 219 (ADOK 219) DIMAPUR SANGTENNÜ (TUESDAY) MONUPII (MAY) 24, 2022

₹ 5.00

Police Complex nung süng atsüngba nungi shir ajangzük: RPP

Dimapur, Monupii/May 23 (TYO): State nung pei molungba aser tashiyim amshia inyaksangshiba bulua lir. Chumoukedima police complex telung nung teak süng atsüngba ya taoksatsüba liasü, saka state indang DGP ajanga kuli agütsüba ya ang tali taoksatsüka lir, ta Rising People's Party (RPP) ajanga sangdong ka nung ashi.

Social media nung noksa prokshiba nung küm 50 jungnüa tain süngdong open market nung sen crore aika jenjang tim yimya mamshi kodasür atsüng, aji Dy. Chief Minister nungi rasaa ashitsüla, ta RPP ajanga takhangba agütsü.

India nung arem dak sendakba ozüngtem ya kanga tesashi lir, anungji süngdong ka

atsüngtsüa jenjang balala nung temelaba nungdaker, saka high security area ka nung yamaji züba-züba süngdong 40-50 atsüngba ya kangasa taoksatsü mapa ka lir. State DGP ajanga sangdong agütsüba nungbo tim mera mesüra teinyaktsü meinyak amai ajiteter, ta ashi.

India nung danga state nung asünungbo idangdusa temerenshi agütsür lila, saka UDA coalition ya iba ken o asütsü atar ama kanga jangja ajiteter.

Tekolakpur shilem aser inyakyim nung ochimashi memelenshira Police Complex Chumoukedima nung süngdong atsüngba nungi Chief Minister Rio aser Dy. CM Y. Patton ajangzüka alitsü südi ta angateter, ta RPP sangdong ajangasa ashi.

NPF Dimapur Division ajanga nübur mang-mangdaksür: Dimapur-II taoba NPF ketdangpur

Dimapur, Monupii/May 23 (TYO): Sakus Mission College, Dimapur nung May 21, 2022 nü senden amenba ya 2-Dimapur-II MLA Moatoshi Longkumer ajanga ayongzükba masü saka Naga People's Front (NPF) office bearers temi ayongzükba liasü aser yangji pa jaok, ta 2-Dimapur-II nungi taoba NPF vice president Sakhu Angami ajanga ashi.

NPF Dimapur Division Core Committee den party indang Central office nungi ketdangsür kari May 22, 2022 osangbener senden ka nung jembidang, nisung kari NPF tenüng tim masüba nung amshia May 21 senden nung "Consultative Meet of NPF Party Functionaries under Dimapur-II A/C" ta amshiba ya tim masü, kechiaser MLA Moatoshi ya party yutsür alinung kechiba NPF tenüng amshir, ta aija liasü.

Party pur tem party principal nung alitsü ta züngzükteper liasü, saka tensa agi MLA Moatoshi lenisüba nung anidaktsü molungteta onok timba aruogo, kechiaser NPF ya tetsü-tebu maliba tanur ka ama asüba ajanga pa sülen anidaka aru, ta NPF nung nübu tejen T Asungba Imsong ajanga ashi.

Tanü nungi onok NPF züngsem masü aser onok indang ID card meyiptsütsü aser adianu ama teka amtemer, temolung ka süer pa yaritsü, ta pai ashi.

NPF ketdangsür kari onok advisory board mali ta sangdongba ya tai, kechiaser onok rongnung advisory board lir aser ID card aser appointment letter lir, ta Dimapur-II A/C indang NPF General Secretary (Admn) ama inyaka arusang, Longshibemo-i ashi.

May 21, 2022 nü senden amentsü lia May 20 nikongdang Dimapur-II A/C tiri MLA Moatoshi nemshiti ka agütsü aser yangji iba senden ya 'illigal' lir anungji mamentsüla, ta zülua liasü. Senden ya party nung inyaker temi ayongba lir, anungji MLA nem tezüluba nung amokmerena agütsütsü aser pa tenüng menüksütsü nungdak mali, anungji tatok meshitsüla, ta Limawati Imchen, taoba Dimapur-II NPF advisor ajanga ashi.

May 21 nü senden nung adenba tetsürtem ya SHGs tem nungi lir ta aitsüba ya khenyongi tai lir, kechiaser SHGs ya MLA Moatoshi ajanga tetsürtem jenjang ajungkettsütsü nükla yur tentettsüba lir, saka iba anogo senden nung adenertem ya Dimapur-II nung ward 13 aser unit 11 nungi lenirtem arua adenba lir, ta Dimapur-II NPF Women Wing tiri ashi.

Dimapur-II nung SHGs 300 dak tema lir, anungji SHGs tem adenshitsu asünungbo Dimapur local ground nung ang asemtsü, aser ni Dimapur-II NPF Women Wing tir inyaka liasü, anungji unit aser ward sasep nung ketdangpurtem ni ang shima lir asünung ni meteta lir aser iba sentong nung parnok ang aden, ta lai ashi.

Ward balala nungi NPF functionaries tem senden ka mena May 21 nü iba senden amentsü lemtet aser iba sentong nung adener ajak agi nisung 202 liasü aser tenünga yua lir, ta leniri ashi.

May 21 tashi onok ajak Dimapur-II A/C NPF züngsem liasü saka iba anogo ang lokti-i MLA Moatoshi sülen anidaktsü molunga liasü, anungji NPF tenüng amshiba ya tim lir, ta ashi.

CM Rio-i state nung meyi mapang atema renemshia aliba indang asadang



Chief Minister's Residential Complex, Kohima nung May 23, 2022 nü meyi mapang lendong-tsüdong ajurudang yariteptsü renemshia aliba asadanga senden ka mena liasü.

Dimapur, Monupii/May 23 (TYO): Nagaland Chief Minister & Chairman NSDMA, Neiphiu Rio lenisüba kübok Chief Minister's Residential Complex, Kohima nung May 23, 2022 nü meyi mapang lendong-tsüdong nungi kumzükba alitsü asoshi renemshia aliba asadanga senden ka mena liasü.

Iba senden nung Cabinet Minister, Advisor, sorkar ketdangsür aser department

balala nungi lenirtem dena liasü. Chief Minister-i meyi mapang anentsüh aser tzümetsüng lendong atalokdang yaritepba department dang nungdakba machinery aser hadir balala renema alitsü ashi. Pai sendaktepa aliba department ajanga dang tali meranga inyaksü aser pei mapa tajungtiba nung inyaka meyi lendong nungi jenbudaktsütsü aser kumzüktsü ajungshia liasü. Kasa mapang CM Rio-i

Deputy Commissioner tem dang Video Conferencing ajanga sensaksem kaa district balala nung tensa asadanga liasü. Deputy Commissioner temia parnok renemshia aliba aser ano district nung chiyongtsü aser nungdakba osettsüset jenjang lemsatapa liasü. Iba senden nung NSDMA, PWD(R&B), Urban Development aser Agriculture department temi PowerPoint presentation agüja liasü.

PDS shidak ketdang masürtem yimjak nung metetdaksütsüla: NPP

Dimapur, Monupii/May 23 (TYO): Civil society aser NGO temi Public Distribution System (PDS) densema State terenlok aser nüburtem ajungtsü dak sendakba ken o balala atema asüngdangbatem Nagaland state sorkari tajungtiba nung paidoktsü merangba asoshi temolung masür aser mepelar, ta National People's Party (NPP) Nagaland State ajanga sangdong ka nung ashi.

National Food Security Act (NFSA), 2013 yangluba sülen PDS inyakyim aser mangdang ulushia Targeted Public Distribution System (TPDS) kübok yimjak yimtsü nung alir nütsüng yongsük shilem 75 tashi aser jila nung alir nütsüng yongsük shilem 50 tashi awajema kumdaktsü.

Nagaland nung PDS shidak magütsüba indang angur aser angashir, aser osang balala aser

asadanga nunga tensa kanga mejungi sayur. Linük nung 2011-2012 mapang PDS jang-o-tzü average leakage ya shilem 46.7 liasü ta asadangteta lir. Aser kasa mapang Nagaland nunga 'PDS off-taken food grains' leakage ta shilem 94.7 liasü, ta ashi. 2005 nungi 2011 tsüngta Comptroller and Auditor General of India ajanga audit agiba osang nunga state nung PDS inyakyim meshidakba kaktetja liasü. Ano CAG report nungsa Department of Food and Civil Supplies ajanga ration card tapi agi agütsüba temai adokja liasü. Ajidang masü jang-o-tzü open market nung ayokba, maliba rejutem, hostel aser Village Grain Banks tem nem jang-o-tzü lemezüktsüba, peria melemezüktsüba, alizüng metongjungi agizüka ayuba aser menur agütsüba, jenjang tali

temloker meshiba aser ki-i-jen shidak maliba indang osangtema lir. CAG ajanga 2011 report nung, item tim masü aser ochimashi maparen ajanga Nagaland nung PDS maparen nung kanga mejungi kongshir ta shia lir. Tesatsüka district kecha nunga oset ayutsü tesem mesüra warehouse mali. Dimapur nung ka aliba densema FCI facilities nunga nungdakba ki-o-jen shidak mali aser state agency ajanga junga achayang masür, anungji jang aser danga oset aika tim masüba shishilembar indang jurila godown temi aor. Iba ama ochimashi azüoktsü aser samadakttsütsü atema state machinery kong ali? ta NPP Nagaland state unit ajanga asüngdang. (Maneni tapak 2 nung...)

Asen sobaliba wazüka ayutsü kanga tongtipang: Rio

Dimapur, Monupii/May 23 (TYO): Sobaliba dak sendakba aben-süoshi, sübosolemtsü, azük-naro timti rizünga ayutsü asoshi Tribal Hobo ajak den State Level Consultative senden ka Capital Convention Centre, Kohima nung May 23, 2022 nü mena liasü.

Tawa tanü fashion show aser aben-süoshi nung asen traditional design tem meshidak aser tim mesüi amshia arur aser item ayak metsünga-reta amshiba nüburtem mezüngshie e-commerce website tem nung ayoker, ta Nagaland Chief Minister, Neiphiu Rio-i ashi.

Iba ama sobaliba dak sendakba aben-süoshi aser aser temaitsütem meshidaki amshiba dang ya Cultural Appropriation ta ajar aser iba ama inyakyim ya züngzünga repranga alitsüla. Cultural appropriation ya kanga nendaka reprangtsüla, kechiaser

Naga nunger sobaliba design aser temaitsütem meshidak amshiba ajanga mashileni meyipzükba amshir aser samadakttsür, ta pai ashi. Dangari asen sobaliba sübo-solemtsü ya mamshitsüla mesüra asen kin aser entrepreneurs temi asen sübo-solemtsü indang shishilempa masütsüla ta ashir masü, saka item ya timi amshitsüla, ta Rio-i jangjashitsü. Anungji Intellectual Property Rights aser Geographical Indications amala tapet temzüng-ozüng kübok asenoki asen sobaliba senmang wazüka ayutsü kanga tongtipang lir, ta Chief Minister-i ashi. Yamaji inyakba ajanga dang asen sübo-solemtsü, temaitsü aser osettsüset timi amshitsü aser meshidaki amshiba azüoktettsü. Anungji sentong nung dena alir ajungai amalitepa tajunglen nungi shilem agiba

ajanga Naga nung ajanga ajangzüktsü imlar, ta pai ashi. Asen sobaliba aser ayak wazüka ayutsü atema kisüng masü saka tarutsü anogotem Naga nunger renloka aotsü atema iba senden ya kanga tongtipang lir, ta Advisor, IT&C, S&T & NRE, Mmholumo Kikon-i ashi. Intellectual Property Rights (IPR) nung aliba ama asen temeden ya inyakyim balala nung inoka mamshi tashi dangar nem asen senmang nung tajangzük agidakttsütsü, ta pai ashi. Iba senden nung Commissioner & Secretary, Kekhrievor Kevichusa, IPos ajanga Committee metetpelaba mapang agia liasü aser Chairman, NHHDC Ltd, Miathou Krose ajanga tarur pela agizüka liasü. Maneni Jt. Secretary, Sharon Longchari-i melepzüng o jembia liasü.

Niuland nung mezüngbuba DPDB senden menogo



Niuland nung mezüngbuba DPDB senden amenba sentong nung tangokba noksa angur.

Dimapur, Monupii/May 23 (TYO): Mezüngbuba Niuland District Planning Development Board senden May 23 nü DC Conference Hall Niuland nung menogo. DC aser Vice-Chairman DPDB Niuland, Ajit Kumar Verma IAS lenisüba nung iba senden mena liasü.

Senden nung PHED minister aser Niuland DPDB mendenbuba Jacob Zhimomi-i, tawa tentetba district ya metropolitan city ka akümtsü lenmang sadema lapoka lir, aser terenlok maparen takaratiba nung takok ngua benoka aotsü tamang lir, ta ashiba den ketdangsur ajak dang pei mapa nendaka inyaksü ajungshi.

Minister-isa, district nung sub-treasury office ka nüngdaka lir ta ashiba den sentepa aliba lokti dang pai iba office asoshi takok tashi inyaksü ta tenangzüka agütsü. Jila temeket nung sorkar ali atsünga arurtem anema jenjang tapet agitsü ta shia, minister-i department ketdangsurtem dang tenüngdakba maparen balala atema administration nem osang agütsütsü metetdaksü.

Niuland jila terenlok asoshi inyaksüji ajak dang tongtibangtiba mapa lir aser terenlok atema senotsü peria angutsü imlar, ta paisa ashi.

Senden nungsa DC, SP aser

Police Reserve office yanglutsü atema benokba agizük aser district nung public Park aser public cemetery atema tesem tapet bushitsü benoka agizüka liasü.

Maneni Gh-1 A/C atema LAPD 2022-2023 scheme agizük aser iba kübok jila nung clock tower ka yanglutsü telemetba agia liasü. Kasa mapang nung Senior SDEO Niuland, Bohovi Yeptho-i, department balala nung tetsükdaksü aliba aser talisa district kübok school balala nung tesayur agi anünga indang metetdaksü. Iba dak sendakba nung DPDB-i ken o dak sendaka aliba ketdangsurtem dangi abentsü telemetba agi.

OTS nung awareness sentong ka agi

Dimapur, Monupii/May 23 (TYO): Samagra Shiksha Nagaland den longjemer Oriental Theological Seminary (OTS)-i ayongzüka tanü Bade, Dimapur kübok OTS campus nung matamabensaba (disability) dak sendakba nung awareness aser sensitization sentong ka ayongzüka agiogo.

Sentong nung state commissioner for Persons with Disability, Diethono Nakhro-i okila jembiba mapang, matamabensarter nem kasa

maongka agütsütsü atema parnok temeden jangjatsü nüngdakba lemsatep.

Laisa, lokti-i matamabensarter mesenmetui amshiba ajanga parnok anioktsü atema tetsükdaksü tulu adoker, ta ashi.

Lai, iba ken o dak sendakba nung Nagaland nung aliba Arogotemi tali shilem agitsü nüngdakba lemsatapa liasü.

Kasa mapang nung Samagra Shiksha team-i, inclusive education indang metetdaksüba

den Nagaland nung inclusive education jenjang lemsatapa liasü.

Senior Lecturer aser Head Inclusive Education and ICT, SCERT, Nagaland aser Jo Foundation mendenbuba Daniel Thong-i, OTS kaketshirtem nem inclusive education indang practical tatishitsütem agütsü aser inclusion nung tongtibang shilem agir ka akümtsü atema theological tamendakdak tashi tait aser tajaba shidak angatetsü nüngdaker ta ashi.

Nagaland House Delhi staff nem quarter tasen agütsü

Dimapur, Monupii/May 23 (TYO): May 21 nü Nagaland House Delhi nem Sector 13, Dwarka Delhi nung staff quarter 51 aser INT Security staff atema mekazükja aliba quarter 8 agütsüogo. Quarter 72 aliba nungi tang temelaba agütsüba quarter tem nung Type-I, Type-II & Type IIA quarter tem densema lir.

Quarter tem ya lottery asaya lemsüogo, koba video dena tangoka yuogo. Iba sentong nung Jyoti Kalash IAS, Addl. Chief Secretary & Chief Resident Commissioner, Sarita Yadav IAS, Joint Resident Commissioner aser Wennyei Konyak NCS, Deputy Resident Commissioner Nagaland House, New Delhi nungera

densema liasü.

29-Dr.APJ Abdul Kalam road, New Delhi nung amenoka aliba Nagaland House yanglushiba dak sendakba nung sorkari tetuyuba agütsüba sülen staff tem quarter taseni belener aotsü, ta Dy. Director & PRO (IPR), Nagaland House, New Delhi, Kuolie Mere-i sangdong ka ajanga metetdaksü.

PDS shidak ketdang masürtem yimjak... (TAPAK 2 NUNGI...)

Sorkari February 18, 2022 nü sangdong ka nung 2022 nungi 2023 atema Tide Over Rice amshir state stockist timba kumdaktsüogo ta ngutet. Nagaland nung aliba district ajunga nem National Food Security Act (NFSA) kübok May 2022 nungo March 2023 atema jang ita shia asoshi metric tonne 3873 agütsüba meteta lir, saka tanü tashi jang alemba indang record shidak monguteter, ta parnoki ashi.

Iba lemsütsüba kübok tsünglanglen agüja aliba district temi tide over rice ya Metric Tonne nung Stockist nung yua alitsüla: Mokokchung - 400, Wokha - 380, Phek - 300, Peren - 200, Tseminyu - 100, Kohima - 400, Longleng -200, Dimapur - 448, Kiphire - 220, Shamatore - 100, Mon - 400, Niuland - 100,

Chumokedima - 100, Noklak - 100, Tuensang - 125 aser Zunheboto - 300.

2018 aser 2019 küm Nagaland Public Rights Awareness and Action Forum (NPRAAF) ajanga nüngdakba pur junga mejangjateti state stockist shima lemsatsüba atema ola adoka liasü. Parnokisa TPDS ya mali aser centre nungi ita shia nüngdakba dang nungi tali agüjaka record tejangja mali, ta nguteta liasü.

Nagaland nem küm shia jang metric tonne 16,625 lemsütsür aser iba ya ta shia metric tonne 1385 alitsü aser PHH kübok Nagaland metric tonne 76,331 ita shia metric tonne 6360 angur, ta NPP ajanga ashi.

Nagaland nung nütsüng yongsük lakh 20 shi aliba shia ya

shidak agibo ita shia jang seren pezü angutsüla. Item jang ya kong sama? Küm aika PDS nungi shiba ajangzüker? Iba ama ochimashi mapa inyakba ya yimjak nung metetdaksütsüla aser tapet temerenshi agütsütsüla, ta NPP ajanga akhang.

PDS asoshi lemsütsüba sen ya state sorkari sentong tajung yanglua aluyimer nem subsidy aser agricultural loan agütsütsüla, metsüjangnatsü tajung alitsüla, tanü-asüng tensa den apet hadir mesüra mozü maliba ali temu alia aluyimer nem lemsütsüla, ta NPP Nagaland state ajanga ashi.

State terenlok dak sendakba nung civil society, NGOs aser nüburtemi teti sorkar dang asüngdangyatsü nüngdaker, ta ashi.

Kohima Aor Pensioner mensem ayonger

Kohima, Monupii/May 23 (TYO): Kohima nung alir Aor pensioner-tem mensem ka taruba Hokolbar May 27, 2022 nung Er. Lanuaküm (Mongsenyimti) retired Adll. Chief Engineer Mechanical, Lower Chandmari, par kidang nikongtsütsü 2.00 ako nung alitsü jatepa lir.

Iba osang ya Wb. Nungshiwati Atsongchanger ajanga metetdaksü. Pai ashiba agi, iba mensem nung Kohima nung alir Aor pensioner-tem telongjem ka tentetsü ajung

majung, aser pensioner-tem yaritepa alitsü leman bushiteptsü tebilemba nung iba mensem ya jateper.

Anungji iba anogo nung pensioner-tem, tetsür tebur ajak medema arua atentsü mepeshia metetdaksüogo. Iba sentong indang tali jangjanüra aser terataba lira, Wb. Nungshiwati mobile no. 8794855760 mesüra Er. Lanuaküm mobile no. 9862346439 den metetpelatsü akok, ka kasa sangdong ajanga metetdaksü.

Kohima DC-i metetdaksür

Dimapur, Monupii/May 23 (TYO): Kohima DC Gregory Thejawelie IAS-i sangdong ka ajanga, Kohima district kübok Kohima yimtsüng meyong ali acre 70.274, Medical College amenoktsü atema alizüksü nüngdaker ta ashi.

Anungji Nagaland Land Requisition Acquisition Act 1965, Section 9 (2) nung agüja aliba tashi amshia State sorkar tetuyuba nung Deputy

Commissioner Kohima-i, iba tesem dak sendakba nung nisung/lokti kari danga tashishiba agütsütsü lira, tashishibatem osang sangdongba sülen anogo 30 tsüngda Deputy Commissioner Kohima Office nung agütsütsü metetdaksüogo.

Ali temeket: North :- Circular Road / Private; South :- Circular Road / Stream; East :- GazieRü aser West :- Circular Road / Private

Ketdangsurtemi check gate tem meita ao



Ketdangsurtemi check gate tem meita aoba noksa nung angur.

Dimapur, Monupii/May 23 (TYO): Home Department tetuyuba dak ajemdaker Chumoukedima district-i, May 23 nü Check gate tem meitaogo.

Check gate tem aser tanga tesemtem nung garitem nungi ozüng alema senotsü saruba indang osang angazükba sülen inspection team dang mapangshia osang agütsütsü tuyuba dak ajemdaker inspection team-i Chumoukedima aser Medziphema check gate meita oa liasü.

Chumoukedima district kübok police check gate, Departmental aser Municipal, aser Town Council check gate tem ya Administration, police, aser DPRO Staff temi mieta oa liasü.

Osang agütsüba anogo nungi tenzüker iba osang agütsüba mapang tashi nung Chumoukedima kübok check gates/toll-gate kecha inyaksangshi mesüi liasü. Chumoukedima Town Council aser Medziphema Town Council indang toll-gate-a shibangogo.

Meita aoba mapang sorokar department balala indang check gate tem rongnung Veterinary, Geology & Mining, Forest, Police, Excise, aser Chumoukedima Town Council densema liasü, koba nija ki dang amenoker lir.

Kasa mapang nung Home Department ajanga Nagaland sorkar tetuyuba dak ajemdaker Mon District Administration aser Police-i, interstate Police check

gate tem dak alaker tanga check gate tem ajak shibangtsütsü atema meit aoba sentong ka ayongzüka agiogo.

Iba team ya ADC Mon, Y. Chingyak Konyak, NCS aser Addl. SP Mon, Ado Yanlem, NPS nati anir ao.

Team-i Mon jila kübok tüsem pezü nung check gate shibanger alibatem asadang. Item tesemtem nung parnoki Signboard tem agitsü aser ken o dak sendaka aliba department tem dang parnok yanglua aliba ki abentsü tetuyuba agütsü.

Iba masüdag DC Mon, Thavaseelan K, IAS-i sangdong ka ajanga interstate police check gate dak alaker tanga check gate ajak shibangtsü tetuyuba agütsür liasü. Maneni sangdong ajangsa, check gate kar danga tetuyuba sülen manidaki inyaksangshiba ngutetra gate nung mena alirtem Indian Penal Code, Sections 188 & 384 dak ajemdaker merenshitsu, ta metetdaksüogo.

Maneni Mokokchung district kübok Mangkolemba Subdivision inspection team kati May 22 nü Tsutapela nung check gate meita ogo. ADC Mangkolemba Dharam Raj IAS lenisüba nung iba meita aoba sentong agia liasü.

Check gate amenoka aliba tesem tonga oa asdangba sülen parnoki Geology and Mining, Veterinary aser Animal Husbandry, Excise department aser NSCN (IM)-i amenoka aliba check gate tem shibangja liasü.

Mehbooba Mufti-i Assam CM Sarma aitsü



Mehbooba Mufti (File photo)

Guwahati, Monupii/May 23 (Agencies): Assam chief minister Himanta Biswa Sarma-i madrassa tem dak sendakba nung pa tebilemba lemsatepba sülen opposition party aser Muslim cleric temi pa aitsü tenzükogo.

Assam CM Himanta Biswa Sarma-i madrassa indang jembiba sülen PDP chief Mehbooba Mufti-i, India nung BJP sorkari Muslim nungertem rongmesotsü meranger ta ashi.

"Muslim nungertem nem telangzüba agütsüdahtsüsi atema parnok rongmesor, ajita asünung dang Gujarat aser UP nung ama Muslim nungertem tepsettsü atema item nisungtem nem maongka agütsüsi," ta Mehbooba Mufti-i ashi.

Mehbooba Mufti-isa, BJP-i amshiba tasa ya British nungeri India yimsüsüba mapang amshiba tasa den mesükteper, ta ashi.

"British nungertemi Muslim nunger anema Hindu nungertem amshi aser tanü BJP-ia kasaji inyakdar. Ato Kilonser-i ola madoki repranga atar," ta Mehbooba Mufti-i ashi.

Assam chief minister Himanta Biswa Sarma-i Deobarnü sentong ka nung o jembiba mapang "madrassa" ta asüba ojang ya mali kümdaktsüsüla ta ashiba sülen iba ken o ano tanaben benoka sensak asem tenzükogo.

Assam CM Himanta Biswa Sarma-i, tanurtem nem school tem nung tamangba yimsü dak

sendakba nung tangazükba agütsüsi melena "normal education" agütsüsüla, ta ashi.

"Iba ojang (madrassa) ya mesamai amshi tashibo tanurtemi doctor aser engineer akümtsü atema bilemtsü makoktsü," ta Himanta-i ashi.

"Nenok tanurtem dang Quran sayuang, saka kidang sayuang," ta pai shisem.

Ajisüaka Assam chief minister-i jembiba olen ya linük nung Muslim cleric tem densema nüburtem aikati magizük.

Assam chief minister Himanta Biswa Sarma aija Assam nungi Islamic scholar Maulana Masood Hassan Qasmi-i, 'madrassa' ta asüba ojang tetezüji school lir.

Maulana Masood Hassan Qasmi-i ashiba agi, private madrassa tem lapoktsü aser shibangtsü atema inyakba ya India temzüng ozüng anema lir.

Paisa, "sorkari madrassa tem general school küma melentsüba onoki pelashishia agizüker. Ajisüaka private madrassa tem shibangtsüba ya temzüng ozüng anema inyaksangshiba maparen ka asütsü," ta ashi.

"Constitution of India, Article 30 nung minority tem nem educational institution tem amenoka achaayangtsü asoshi temeden agüja lir," ta Maulana Qasmi-i News 18 dang ashi.

Temetetsükaji Constitution of India, Article 30(1) nung yamai shia lir: "tamangba yimsü mesüra oshi dak amendaker aliba minority ajak nem parnoki

mulungba educational institution tem amenoka achaayangtsü atema temeden agütsüsi."

Assam: Mangaldoi ayongküm anenba ajanga Gerimari yimsüng timtem nung lir

Mangaldoi, Monupii/May 23 (Agencies): Assam kübok Darrang district nung tzümetsüng asemshia aoba ajanga nüburtem anisüngzüng anguba mapang district kübok tesem kar nung ayongküm nung ali anenzüka aoba ya tebilemtsü tulu ka kümogo.

Assam, Darrang district nung Mowamari Gaon Panchayat kübok Gerimari yimsüng nung tawa tzümetsüng aruba sülen Mangaldai ayongküm anenzüka aoba ya tebilemtsü tulu ka kümogo.

Iba tzümetsüng lendong nung kibong pezübo talidak ki makai kümogo.

"May 17 nü ayong moshia ayimba sülen kibong pezü ki den tanga osettsüt balala aponger oadokogo," ta panchayat ward züngsem Bhashan Sarkar-i ayongküm anenzüka aoba tesem nung Hombarnü Northeast Now den sensaksemba mapang ashi.

Paisa, "item kibongtem ya iba tesem nung küm semer dak tema lia liasü," ta ashi.

"Ali anenba ajanga ayongküm nung küm aika lia aliba kibongtem aika aser kaketshisatsü bushidak aser tekülemdak aika lendongbang nung toktsüogo," ta panchayat züngsem yagisa ashi.

Maneni pai ketdangsurtem dang, nüburtem nem teküzmükba agütsüsi atema iba ken o ya takaratiba nung anepalutsüsi aser tzümetsüng tanaben marushi tsüngda lendong agi kongshir aliba kibongtem nem teyari agütsüsi mepeshia metetdaktüsügo.

Kasa mapang nung yimdaklirtemi ashiba agi, local MLA aser taoba water resource minister Basanta Das dang iba tebilemtsü bentettsü atema osang agütsüogo, ajisüaka tang tashi nung kecha jenjang agia mali.

Tripura, Mizoram nati Bangladesh ajanga oset bener arutsü temelaba meshi

Itanagar, Monupii/May 23 (Agencies): Tripura aser Mizoram state sorkari Bangladesh ajanga tenüngdakba osettem bener arutsü atema ministry of external affairs (MEA) dang temelaba meshiogo.

Assam nung tzümetsüng aser anentsü lendong ataloker aliba ajanga state anaprongla den sendaktepa aliba railway aser lenmang nung tetsükdaktsü adoker chiyongtsü aser totzü agi anüngba mapang ka lir.

Northeast Frontier Railway (NFR)-i iba state anati khuabenba aser passenger train tem June ita tashi meyoktsü telemtetba agiogo.

Assam kübok Dima Hasao district ajanga Lumding-Badarpur railway line yagi

Tripura, Mizoram, Manipur aser south Assam sendaktepdaktsü, ajisüaka iba train lenmang ya tzümetsü aser anentsüh agi kanga mejungi raksatsüogo.

Tripura sorkari ketdangsurtemi ashiba agi, kidanger linük ajanga tenüngdakba osettem belener arutsü atema state-i Bangladesh den tongtepratepogo.

Kasa mapang nung Mizoram sorkaria Bangladesh ajanga tenüngdakba osettem state-i belener arutsü atema temelaba meshitsü asoshi MEA den tongtepratepogo.

Mizoram minister K Lalrinliana-i ashiba agi, "onoki Bangladesh adena tenüngdakba osettem belener arutsü atema temelaba meshitsü asoshi MEA den tongtepratepogo."

NDA sorkar amenoba sülen NE renlokdar: Kiren Rijiju

Itanagar, Monupii/May 23 (Agencies): Union Minister for Law & Justice, Kiren Rijiju-i ashiba agi, Ato Kilonser Narendra Modi lenisüba nung National Democratic Alliance (NDA) kübok northeast tesem kanga kara renlokyonga odar.

Arunachal Pradesh kübok Namsai nung Deobarnü lokti senden ka nung o jembiba mapang Rijiju-i, Centre nung NDA-i sorkar kümetba sülen lenla ajak nung temelenshi adokogo.

"Tangbo Arunachal kübok kinük nung aliba tesemtem nunga lenmang tajung, electricity, aser water supply teperi lir. Küm ter tejakdang item ya pungmang dang liasü," ta Rijiju-i ashi.

Paisa, "taoba defence minister, A K Anthony-i Parliament nung ashiba agi, linük nijiso anguba sülen sorkari China den artsü nung lenmang meyanglu, kechiyong China nunger sepaitemi India amaktsü aser yimjung raksatsüsi ta bilem. Iba tebilemdangba dak ajemdaker Centre nung sorkar



Kiren Rijiju

balalai nüburtem terenlok atema mebelelemi amokbanger yimsüsü aruogo," ta ashi.

Rijiju-i ashiba agi, Ato Kilonser-i terenlok maparen ajak kinükisang aser nisungshi tongtetdaktüsü atema jenjang tapet agitsü asoshi pa nem nongloktüsügo.

"Kidanger linük den tesendaktep mejungi meliner ajisüaka linük litsü ajak kümzüka ayutsü nüngdaker. Iba nükjidong nung ajemdaker Ato Kilonseri sentongtem renem tenzük aser asenoki tang terenlok ajangshidar," ta pai ashi.

Assam: Dima Hasao railway line atema sen crore 180 agütsü

Guwahati, Monupii/May 23 (Agencies): Assam nung Dima Hasao district kübok Lumding-Badarpur section nung railway line yanglushitsü atema centre-i sen crore 180 agütsüogo.

Iba osang ya Assam chief minister Himanta Biswa Sarma-i metetdakja liasü.

"@RailMinIndia-i, Dima Hasao nung tzümetsüng aser anentsüh agi raksatsür aliba railway network yanglushitsü atema sen crore 180 agütsüogo," ta Assam CM Himanta Biswa Sarma-i tweet asü.

Dima Hasao district kübok Lumding-Badarpur section

nung railway line ya taoba hopta tzümetsüng aser anentsüh ajanga ajanga raksatsüogo.

Assam CM Himanta Biswa Sarma-isa, Assam nung Dima Hasao district kübok Lumding-Badarpur section nung railway line ya July 10 tashi nungbo yanglushitsüsi ta tenangzüka agütsüogo, ta metetdaktüsü.

"Iba rail lenmang raksar aliba ya yanglushiba ajanga Assam kübok Barak aser Brahmaputra valley sendaktepsüba dang masü saka Tripura, Mizoram aser Manipur nung tesem kar linük nung tanga tesemtem den sendaktepdaktsüsi," ta CM Sarma-i shisem.



Assam Trinamool Congress (TMC)-i, Assam nung Nagaon district kübok Batatdrava nung ango ayoker ka police chiokba sülen mapang tatsüka dang lir asüba ken o bushisüngdangtsü khangogo. Iba nisungba asüba ajanga Batatdrava nung mepetmesü tulu adok aser nüburtemi police station rongtokja liasü.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 24, 2022

Aitsütepba mapang masü

A tangji, Ao Sendeni metetdaksüba ama, tang ama Naga yimten tebilemsü ken o tatembang küma latettsü aritepba mapang ya Naga nungertem rongnung kati ka aitsütepba mapang masü saka shisalemsatepa ajungshitepba mapang ka asütsüla. Shiba südir sang, kati ka aitsütsübo temela saka kati ka asoshi tajung inyaksütsübo tasak, aji alima meimchir shisatsü dak keta lir. Ajsüaka, nübortem yimjung nung putepa lidaktsütsü atema, nisung shiai tangar aitsütsü melen, yimten aser lokti meshitaki aoba mapang, kati ka metongshija ajungshira, iba jagiang meshitakji shitak küma metongshitettsü aser tamajung agi tajung küma puteptettsü. Tanü tashi Naga yimten tebilemsü mekotteti Naga nungertem rongnung telemsa aser meputepang tali-tali akümba ya asenok ajak pei pei yari tashi mait agi sünga lir, ajsüaka asenoki kati ka metongshija ajungshitsü melen aitsütsüba shisatsü dang asen mulungjangi aruba agi, asenok ajak temulungjang kanga menena kümogo. Atangji, yimten nungbo aiben o tetsüroka jembitsüsa adoker aser nungsen agia arütsüteptsüsa ataloker. Ibajibo tamajung nungi pei yimten yimli kümzüküba aser lokti mapa nung takok ngunüba agi asütsüa akok, ajsüaka asen tamakok angu shia tangar - tangar dang aitsüra, ibajibo asensasa bilemdangtsü tuluka lir. Aji oda, India den Naga yimten ken o jembibaren nunga, talisa NSCN-IM teloki Wb. Dr.S.C.Jamir aitsüba mapang - mapang shia angashir aser angur. Iba jagi S.C. Jamir nung tutsür dang ashi NSCN-IM tajangzük mangur aser Naga nungerberbo akoksar. Tanü asenoki aginüaka maginüaka S.C.Jamir nungertemi akümba Nagaland state nung asenok joko küm 60 junga lia arur. Aji oda, Nagaland state anguba anogo dang masü saka India nüchiso anguba aser India temzüng latetba anogotem ajak nung Nagaland nung yimsüsürtemi Jana Gana Mana naklo ken tena India wako nem salem agüja amonger. Ajsüaka, ano külen Naga nungertemi yimten nüchiso atema nokdaker, anungji Nagaland state akümba ajanga Naga nung yimten nükjidong matalok aser Naga yimten tebilemsü ken o tatembang mekümtet ta sayur. Iba ana tsüngdaji Naga nung lenirtem kati ka aitsütepa amongba ajanga Naga nungertem linük tenzükertem rongnung telokang aika küma lemsaogo aser Naga yimten telatetba kati marutet kangshiba angur. Ibaji S.C.Jamir taia masü mesüra NSCN-IM taia masü saka Naga nungertem tai asütsü, kechiyong Naga yimten latettsüba ya parnok shinga mulunga masü saka Naga nungertem mulung. Ajsüaka, Naga nungertemi ola madokba agi, Naga yimten olaji parnok ola akümer aser parnok o parnok na aitsütepdang Naga nungerberbo ayangdaka maka kümdagi. Atangji, Naga yimten jenjang tasen ka latettsü atema jembibaji India government o S.C.Jamir na tsüngda masü saka Naga nungertem linük tenzükertem o India government na tsüngda lir, anungji parnoki Naga nungertem nungi shisatsü agia ken o lemteptsü tim. Iba ama mapang, kati kati na tsüngdakba nisungtem jaoka shisalemsateptsüba nungdak adoker. Aji oda, tang ama Naga yimten atema kanga tongtibang mapang ka ajurudang, Naga nungertem rongnung Dr.S.C.Jamir nungertem amaji, India government-i dang masü saka Naga nungertem linük tenzükertem jaoka shisalemsateptsü tim. Atangji, pai ashibajisa agitsü ta masü saka pa ama nungi otsü aser tebilemba metetba jagi ken o jembiba nung teyari angutsü. Aji oda, Naga yimten tebilemsü ken o ya tipdema latettsü atemabo, kati ka maitsütepi, S.C.Jamir o NSCN-IM telok na ajuruteptettsüla, kechiyong ajak Naga nungertem aser Naga nungertem yimli atema jembir. Joko, Naga nungertem asoshibo, ashiko, "Honourable aser Acceptable Solution" ji Naga nungertem lushi ajak yimten ka küma longjembaji masü mesüra Naga yimten nüchiso jenjang ka latetbajia masü mesüra Naga nungertem wako amshitsüsa temzüng balaka yanglutetbajia masü, saka Naga nungertem ajak temulung ka ser Naga nungertem a ta peisasa nümadangteta bilema, telongjem nung putepa alitsüsa, jenjang ka latetbajia dang asütsü. Naga nungertem aji agizüketra, kechisütsü arishi tepiyong kati ka aitsütepa kazütsü !

OLEMSABANG

NAGALAND CLEAN ELECTION: SENSO CANDIDATE, RSS ASER ELECTION MANIFESTO

- Imli P. Lemtur

(Yashi adok nungi...)

c) Party Camp Azüoktsüla

Election mapang, Assam nung pei party camp lapoka alir, saka yangji pika cha (red tea) dang angutsü. Sen alemba mali. Chiyungbaji mangutsü. Nisung longsoa kazütepbaji policei azüoker. Party Camp alitsüba tim dang, saka yangji ak tepseta chiyungtepbaji yimdeni azüoktsüla. Yi ajema malitsüla. Camp nung nisung kwika kazüteptsü, ibajia yimdeni latettsüla. Item özüng ajanga election mapang azü tokshiba aser minprongba aika nungi kümzüktsü.

d) Election Manifesto Meshitsüla

Election Manifesto meshitsü asoshi voters nem Constitution of India, **Section 19 nung temeden agüja lir. Election manifesto kechi? Temesung oshi nung, Election manifesto "An election manifesto is essentially a list of policies that a political party says it will enact if it is voted into office at a general election" or An Election Manifesto is a formal statement of the programme and objectives of a political party. The Manifesto contains programmers and promises for all sections of the society."**

Tetezü, Kandidatetemi election mapang, nüburi pa/la shimra, nübur asoshi kechisa inyaksütsü, item nangzükba dang election manifesto ta ajar.

Asenok Naga lima nung, election aier ajak dang election manifesto meshitsü asoshi asenok voter-tem temeden kar. Aser kodang candidate-/sorkari nangzükbatem meinyaklir, voter-temi iba sorkar anema ola adoktsüji asenok temeden, saka kodang nai election mapang voteji sen yong yokdir, na election manifesto meshitsü asoshi temeden maka.

Election manifesto ayimtsü asoshi Clean Election Committee-i Candidate shia dang akhangtsüla aser platform yanglutsütsü nungdaker. Ibai ajanga Electionji lemang aisü nung clean akümtsü.

e) Secular Party Shimtsüla

Indiaji Secular Nation ka lir. Secular tetezü, tamangba yimsü ka (Religion) agi aniba linük ka masü. India ya "Freedom of Religion" akaba linük ka (Article 25). Anungji, Nagaland nung Political party kobaisa "One Religious Ideologies" bener arur asenok voter-temi metettsüla. Burwati Ozukumi YSS nung ashiba agi, "RSS (Rashtriya swayamsewak sangh) ya Hindu Nationalist Organization lir. Saka iba organization yagi directly election nung shilem magiteter anungji parnok tejangraba ajakji BJP ajanger inyadaksür. Saka parnok policyji asenok tamangba ajanga magizüketlabo toktsütsü. Saka lenir dang tajung shimti ta nibo angateter."

Party mashi ka agi Election nung tokteptsü akok, saka Political parties indang ideologies metettsüla. Burwati Ozukumi ashiba ama, RSS-i pokhümba Political partyji BJP ya lir. Parnoki Nathuram Godse, shibai Mahatma Gandhi kaset, pa tushir. RSS office nung India National Flag mamshir saka Saffron Colour Flag amshir. Asenok Clean election indang jembir saka RSS asen Arogo kimongi aitogo. Ajita süakasa, asenok ola madoki lir. Unclean Election dang nungi RSS kimongi aibaji tetsütsü tulutiba lir.

Assam nung, Sarbananda Sonowal taoba CM alidang, BJP ajanga nashi shi maleptsü aser mayoktsü ta özüng aru, saka Jorhat district nungbo iba özüngji magizüker ta sangdong, kechiaser Sarbananda Sonowalji tribal liasü. Saka kodang Himanta Biswa Sarma Assam CM aküm, nashi shi indang özüngji tesashiba aküm.

The Assam Cattle Preservation Bill, 2021, seeking to regulate the slaughter, consumption and transportation of cattle, was passed in the Assembly on Friday.

Chief Minister Himanta Biswa Sarma had tabled the Bill in the House on July 12.

"The new legislation, replacing a similar Act of 1950, aims at forbidding the sale and purchase of beef in places other than those permitted by the competent authorities," he said.

The Chief Minister had earlier pointed out that the legislation would ensure that permission to sell beef is not granted in areas predominantly inhabited by Hindu, Jain, Sikh and other non-beef-eating communities or within a 5 km radius of a temple, satra (Vaishnav monastery) and any other religious institutions as may be prescribed by the authorities. (Source: The Hindu).

Iba özüng anema ola adoker shinga mali asü, kechiaser Sorkarji par meyong aser public opinion kecha magi özüngji pass asü. Naga lima nunga milungi government schools, Central Offices ajak nung Saffron colour uniform bener arutsü mena mali aser asenoki kecha meshitettsü. Milungi, government schooltem nung Ramayan Mahabharat compulsory agitsü tenzüktsü mena mali aser asenoki kecha meshitettsü. Asenok Nagaland 371A agi wazüka alibaji Kashmir tia-i aitsü mena mali. Article 371A ji kechi? 371A. "Special provision with respect to the State of Nagaland Special provision with respect to the State of Nagaland.—(1) Notwithstanding anything in this Constitution,— (a) no Act of Parliament in respect of— (i) religious or social practices of the Nagas, (ii) Naga customary law and procedure, (iii) administration of civil and criminal justice involving decisions according to Naga customary law, (iv) ownership and transfer of land and its resources..."

Asenok Naga nungertem sen (money), tashi (power), aser pei asoshi bilema (selfish) nungi jenbotsüla. Developmentji particular political party kati bener arutsütsü masü. Kechi political party lidir liaka, Candidatebaji dang, nükla tajung akaba, Tsüngrem tsübuba aser pei nübur meimba süra asen Naga limaji tejakleni aotsü.

f. Rajemshi:

Naga lima nung Clean Electionji koba lemangtem nungsa Clean asütsülar asenok ajaki tutetta ashitsüla aser ibai tutettsü asoshi ajaki taroktibai ia bushiteter, lemang tasen sadema sayutsüla. Item lemangtemji, asenok yimtsüng context asoshi tapet asütsüla aser nüburtemi angatettsüsa lemangtem asütsüla.

Tatema Naga lima nung electionji clean süra kechisa tajangzük lir? Ni tongtibang kar lemsateper.

- Clean Election yimiyimji voter-tem asoshi dang tajangzük lir.
- Clean Election yimiyimji, na aser ner chinur tarutsü kümtem nung jangratema alitsü asoshi lir.
- Clean Election yimiyim ajanga yimtsüng shia lemangtem tajungba akümtsü.
- Clean Election yimiyim ajanga, yimtsüng shia nung electricity aser dispensary/Mozü ki tajung arutsü.
- Clean election yimiyim ajanga, Nagaland nung Medical College aser Engineering College lapoktettsü.
- Clean election yimiyim ajanga sensakertema pei chirnur, Nagaland nung Medical College aser Engineering Colleges nung züngtettsü.
- Clean Election yimiyim ajanga Sorkar tenzükertem mapang shitak nung ita sen, talisa School tesayurtem angutsü.
- Clean election yimiyim janga, backdoor appointment samatsü, aser temsüa alirtema, political backing meliaka mapa angutsü.
- Clean election yimiyim ajanga sübokrem samatsü.
- Clean election yimiyim ajanga lenir tajungtem jenti adoktsü.

Ano aika lir. Naga lima yanglushitsü asoshi Nagaland nung election merüktetta ayutsü nungdaker, aser election merütettsü asoshi ne vote nung tashi lir. Asen vote sarasadema kümdanga amshidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir



Longsa Laishir Telungjem (LLT) tenteter kum 25 ajungba Silver Jubilee sentong May 21 & 22, 2022 anogo ananü "tabensaba dangi ainba" omen dak rangloker Longsa Baptist Arogo nung amungba mapang tangokba noksa nung angur. Sentong nung Freelance Preacher & Teacher, Singapore nungi Rev. Dr. Peter Jamir aser World Impact Community Church, Dimapur Pastor, Wb. Alemsünep nadi tongti onük jembia liasü. Laishirtem noklang dak tema adenshi aser iba mapang Laishir 6-i pei azungba lenla balala nung tangar dang alakteta takok ngutetba asoshi LLT sabang ajanga tetushi senpet agütsü. Mokokchung, 23rd May, 2022



Ungma nunger toklang tenzukertem ashijunglem sentong ka 21 & 22 May anogo ana Ungma Baptist Arogo nung akadang tangokba noksa nung angur. Sentong nung Ungma nunger arogo aser riju (institution) balala nung inyaker ajak agi 35 aden. Tongti o jembir; Ungma Baptist Arogo Pastor, Rev. Dr. Noklen Longkümer-i "tanü arogo wadang tebilemtsü" aser Aliba Baptist Arogo Pastor, Rev. Nungshi Pongen-i "tenzüka wadang nung süki ulushiba" onük nung ajemdaker tensa den apet tagitsü onük aika bener arua lemsatepa liasü, ta osang ajanga metetdaksü. Ungma, 22nd May, 2022

ANO GO ABEN TSÜNGREM DEN

Tsüngremer Mapang Nung Amangang - T.ken 94:1-10

"Kibuba, tamajungertemi kopika... takok angutsü?" (t.3). Ajaki iba tasüngdangbaji asüngdang. Iba temulung nung shia bilemba o Laishiba nung aiben shia lir. Temeshi nisungtemi ayimtener, "O Kibuba, kobika?" Saul chubai Dawid taküm agitsü arishidang Dawidi iba tasüngdangba aiben asüngdanga liasü, "O Kibuba, Nai nangzükba chuba mendeni ni matudang kobika ni yamai alitsü ? "

Tsüngrem Pa sentong asenok asoshi kar ta ken züluri ashi. Pai asenok sarasadem angashir aser asen nungdak meteta lir. Kechi ataloker Pai shidakji metet. Tamajungeri parnok kübok ajak lir ta bilemer. "Aser parnok ashir, Kibubai tangua mangutsü, mesüra Yakob Tsüngremi tangateta mangatetter" (t.7). "Onoki kechi inyaker angutsü makok; Tsüngremi kecha meinyaktetsü." Tamajunger tiyazü tamang ibaji lir. Saka ken züluri ibaji apuoktsüba kuli agi langzü. "Shibai tenarong neploktsü, Pai mangashili ma? Shibai tenük yanglu, Pai menguli ma? Shibai kintem o bendanger, oda shibai nisung dang shisatsü sayur, Pai marütsüli ma?" (t.9,10). Tsüngremji asenok dang nungi temeli tatsükba asü? Alima nung kechi ataloker Pai angur. Pai pa nüburtemi ayimtenba angashir aser azüoker.

Mapa ajak asen teka nung ayutsü asenoki bilemer. Mosai iba mapaji inyaker aser pa lisem limai odaktsü aser idakji pa kum 40 Tsüngrem nungi angazüka ali. Na "kopika, Kibuba" ta ayimtentsü tia ka nung lir. Tsüngrem dak ranglokang aser tiaji ne dang nungi Pai tajungba metetta lir ta bilemtetang-tali metetta lir. Idangji pa dang ataa liang. Mita liang aser sarasademang. Pai pa tenangzükbatem ayutsü ta nai jangjatsü.

Tsüngrem inyakyim aser mapang angazüktsüji taküm tepiyong mapa lir. Kodang nai Tsüngremi inyaksü asoshi aremzüka atatsü nungdakdir, Pa dak mezüngbuba ranglokang aser Laishiba nung Pa tenangzükbatem nung azüitang. Idangji Pai anealuba nung anisüngzükang. Pai ne tia metet aser Pai pa otem ayur. Pai mapang tetemsü nung inyaksü.

Ao Theological Association

32 Buba Kümsem Imti Mungdang
Anogo : 27 - 29 May 2022
Tesentepdak : Longkhum Baptist Arogo



OMEN : Tasüngtetba Nung Telungjem

KETDANGPURTEM

- Tir : Rev. T. Lima Longkumer, Pastor, CBA
- Tatong Tir : Rev. Jongpong, Pastor, MBA
- Senyur : Mr. Chubatemjen, SS Co-ordinator ABAM

MAY 27, 2022

Hokolbar Aonung Sentep : Mapang - 6:00 PM

- SENTONGLENIR : ATA Ketdangpurtem
- Sentong Lapoktsü : Longkhum Baptist Arogo.

- Lai Zünger Sarasademtsü : Rev. Ayu, Pastor, Debuia Baptist Arogo.
- Asür Bilemtetba : Rev. Dr. Temjen Ozüküm, Pastor, Indisen Baptist Arogo.
- Tarur Metetpela Mapang : Rev. Jongpong, Pastor, Tatong Tir, ATA.
- Pela Agizükba : Longkhum Baptist Arogo.
- Temeja Ken : Ungma Baptist Arogo Choir
- Tayongzükba O : Rev. T. Lima Longkumer, Pastor, Tir ATA.
- Ni Ya Shinür : Rev. Dr. Takatemjen
- Onük : Purity in Plurality (30 Mins.)
- Tejembir : Dr. Samuel Longkumer
- Tatem Sarasadem : Mr. Sentilong, Pastor, Longjang Baptist Arogo.

MAY 28, 2022

- Honibar Anepdang Sentep : Mapang - 9:00 AM - 12:30 PM
- Tekülem Mapang : Rev. Lanuyanger Dimapur (20 mins)
- Shisatokden Mapang : Mezüng Shilem 9:30 AM - 11:00 AM
- Onir : Mr. Imsütoshi Lemtur Pastor, KABA
- Onük : Tasüngtet Laishir
- Tejembir : Rev. Prof. Mar Pongen ES, ABAM (40 mins).
- O Lemtep Mapang :
- Shisatokden Mapang : Tanabuba Shilem 11:00 AM - 12:30 PM
- Onir : Toshi Aier, CTC, Aolijen
- Tanabuba Onük : Tasüngtet Lokti-Yimden
- Tejembir : Rev. Dr. Wati Longchar (40 mins)
- O Lemtep Mapang :

TEA BREAK : 12:30 PM - 1:00 PM

Honibar Anüngdang Senden : Mapang 01:00 PM - 3:00 PM

- Lokti O Lemtep Mapang : ATA Ketdangpurtem

MAY 28, 2022

Honibar Aonung Sentep : Mapang - 5:00 PM

- Tekülem Lenir : Rev. Aowapang, Pastor Ao Baptist Arogo, Guwahati.
- Lai Zünger Sarasademtsü : Rev. Lipok Changtongya Town BA
- ATA Atema Tenla Bendentsü : Mr. Chubatemjen, Senyur, ATA.
- Tayongzükba O : Village Council Chairman, Longkhum.
- Temeja Ken : 1. Kümlong Baptist Arogo Choir 2. CTC Student's, Aolijen.
- Onük : Tasüngtet Lipoküm
- Tejembir : Rev. Prof. Narola Imchen, Principal ETC, Jorhat (30 mins.).
- Tatem Sarasadem : Mrs. Asangla, Asso. Pastor Women, Yisemyong Baptist Arogo.
- Sempet Salaba Mapang : l/c1. Talimoa, Asso. Pastor Youth, Diphuphar Ao Baptist Arogo.
- 2. Imkümeren, Youth Promoter, Alempang Baptist Arogo.

MAY 29, 2022

Anepdang Sarasadem Mapang : Mapang - 5:00 AM - 7:00 AM

- Lenirtem : 1. Rev. Dr. Alemrenba, Delhi Ao Baptist Arogo. 2. Mrs. Temsüla Lemtur, Impur 3. Mrs. Alemla, Asso. Pastor Women, Shillong Ao Baptist Arogo. 4. Rev. I. Yanglu Imsong, Dimapur.

Deobar Anepdang Sentep

Mapang : 10:00 AM

- Tekülem Lenir : Mrs. Alemla Mozür, Secretary, ABAM Women Ministry.
- Lai zünger sarasademtsü : Mrs. Shilula Asso. Pastor Women, MTBA.
- Temeja Ken : Longkhum Baptist Arogo Choir.

Kijungluba Lifetime Ministerial Award

- Tenla bendentsü : Rev. T. Aka, Pastor, Longkhum Baptist Arogo.
- Ken Ka : OTS Students
- Onük : Tasüngtetba Nung Telungjem
- Tejembir : Prof. Alongla, OTS, Dimapur, (30 mins).
- Kibuba Benjung : Rev. P. Chuba Asso. Pastor, MTBA

MAY 29, 2022

Deobar Aonung Sentep - Mapang : 5:00 PM

- Tekülem Lenir : Rev. Alemla, Asso. Pastor Women, Khar Baptist Arogo.
- Lai Zünger Sarasademtsü : Rev. Tongpang, Pastor, Tuli Lenden Baptist Arogo.
- Tir Tatem O : Rev. T. Lima Longkumer.
- Menden Melentepba Mapang : Temeja Ken : Mangmetong Baptist Arogo Choir
- Mulungnen O : Mrs. T. Arenla Ao, Executive Member, ATA.
- Temeja Ken : Impur Bible School.
- Onük : Tasüngtet Arogo.
- Tejembir : Rev. I. Wati, Pastor, Dimapur Ao Baptist Arogo.
- Sentong Shipang : Mokokchung Senso Laishir Telungjem.

TEMETETSÜ

- * Iba Sentong Covid-19 SOP meraksai agitsü ajak nem metetdaksür.
- * Longkhum Baptist Arogo, sentong nung shilem alir aser sentong ajak takok asoshi sarasadema atadi.

OLONG PAITEP # 6179

| | | | | | | | | | |
|----|--|---|---|----|---|----|---|---|----|
| 1 | | | 2 | | | 3 | | 4 | |
| | | | | | | | | | |
| | | | | | 5 | | | | |
| | | 6 | | | | | | | |
| | | | | | | | 7 | | |
| | | | | | | | | | |
| | | 8 | | | | | | | |
| 9 | | | | | | | | | 10 |
| | | | | 11 | | 12 | | | |
| | | | | | | | | | |
| 13 | | | | | | | | | |
| | | | | | | | | | |
| 14 | | | | | | 15 | | | |

- | | | | |
|--------------------|-------|-------------------------------|-------|
| TIPILEN | | LANGTSÜNGLEN | |
| 1. Chiyungtsü oksa | - (5) | 1. An tetsü | - (5) |
| 3. Tatalokbatem | - (5) | 2. Juzüa senzüba shiruru | - (7) |
| 5. Tama | - (6) | 3. Tamendakdak | - (4) |
| 6. Pei meyong aküm | - (3) | 4. Tiak-asang | - (6) |
| 7. _ _ _ _ bang | - (4) | 7. Tasa | - (7) |
| 8. Kinungpurtem | - (7) | 8. Süngjang telung nung aliba | - (6) |
| 9. Nokdak masü | - (4) | 10. Ibai masü | - (5) |
| 12. _ _ _ la | - (3) | 11. Ano mamen | - (4) |
| 13. Ochi masü | - (6) | | |
| 14. Yagi Sü ataker | - (5) | | |
| 15. Temadok | - (5) | | |

OLONG PAITEP # 6177 TELANGZÜBA

- | | |
|---------------------------------------|---|
| TIPILEN : | LANGTSÜNGLEN : |
| 1. Semtu, 3. Lepko, 5. Bilem, 8. Ulu, | 1. Sayu, 2. Teb, 4. Kimong, 6. Lungkak, |
| 10. Tsünpang, 11. Tesangwa, | 7. Milak, 9. Zünga, 10. Temopu, |
| 13. Aoksa, 15. Putir, 16. Yipru. | 12. Walu, 14. Ali. |

Agüja aliba noksa nung meputepi aliba 10 bushiang



TANÜBO NAI LANGZÜANG

Q. Koba yimti nung World Economic Forum (WEF) Annual meeting 2022 agidar?
 [A] New York [B] Davos [C] Geneva [D] Paris

(Taruba adok nung onoki langzüsü)

YASHI ADOK TELANGZÜBA : Ministry of Housing and Urban Affairs

AO OSHI ANGAZÜKDAK:

TANÜ ANGAZÜKTSÜBA OJANG

Mezüpelang

(adj) mebentet, temeyoktep, tebenja (mix up)

* Asenok rongnung kin kidong *mezüpelang* masütsü tim.

Mezütep

(v) meyoktep (mix)

* Ni chi o aon na *mezüteper* azü nem agütsü.



Tir Yimyim

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.


Tepela Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA

1844 küm May 24 nü Samuel F. B. Morse-i Washington, D.C. nungi Baltimore tashi mezüng 'telegraphic message' (Morse telegram) ka yoka liasü.



SUDOKU # 6217

TELANGZÜBA # 6216

| | | | | | | | | | | | | | | | | | | | |
|---|---|---|---|---|---|---|---|---|--|--|---|---|---|---|---|---|---|---|---|
| | | | | | | 9 | 8 | | | | | | | | | | | | |
| | 4 | | 2 | | 7 | 5 | | | | | 3 | 9 | 6 | 8 | 4 | 2 | 5 | 1 | 7 |
| | 7 | 9 | 1 | | 6 | 3 | | | | | 2 | 7 | 5 | 1 | 9 | 6 | 3 | 4 | 8 |
| 6 | | | 9 | | 8 | | | | | | 9 | 6 | 1 | 7 | 8 | 4 | 2 | 5 | 3 |
| | 9 | 1 | 6 | 2 | | | | 4 | | | 5 | 8 | 2 | 6 | 3 | 9 | 4 | 7 | 1 |
| | 2 | | | 7 | 1 | | | | | | 4 | 3 | 7 | 5 | 2 | 1 | 9 | 8 | 6 |
| 9 | 1 | | 4 | 3 | 5 | 2 | | | | | 6 | 5 | 4 | 9 | 1 | 8 | 7 | 3 | 2 |
| 3 | | | | | | | 1 | 7 | | | 7 | 1 | 3 | 2 | 6 | 5 | 8 | 9 | 4 |
| 2 | | | 7 | | | | | | | | 8 | 2 | 9 | 4 | 7 | 3 | 1 | 6 | 5 |

OJANG LUTEP # 5764

- MAJTAUNG :
- NGDA :
- EMBBILA :
- UNGJAMULNG :
- GIJA :
- NGATAR :
- MAATE :
- UNTAJG :
- CHKEA :
- INYAKMEER :

OJANG LUTEP TELANGZÜBA # 57363

KHEN KHENBO TEINYAKERIA TASÜSA MAPA NUNG MEMETETTI AIBELENA INYAKADOKER ALIR

TAN HOPTA ATEMA - KOMA SÜLA ?

Q. Nagaland nung police department ya mali nunga koma süla ?

India ainba nung Japan-i tongtiband shilem ka agiogo: PM Modi



May 23, 2022 nü Japan yimtiba, Tokyo nung India Ato kilonser, Narendra Modi-i Suzuki Motor Corporation adviser aser CEO, Osamu Suzuki (abelen) ajurua senden amenba sülen tangokba noksa nung angur.

Tokyo, Monupii/May 23 (Agencies): Hombarnü Ato kilonser, Narendra Modi-i,

Japan aser India na ya partner tajung ka aser tang tashi nung India linük ainba nung Japan-i tongtiband shilem ka agiogo, ta metetdaksü.

Narendra Modi-isa, "India aser Japan na tesendaktepji ka dang, tanela ka aser amalitep nung tesendaktep junga lir," ta metetdaksü.

Akhidang nungi linük ana sobaliba tsütsü tesendaktep aliba dak sendakba nung Modi-i, "Swami Vivekanand-i puti otsü atema Chicago-i maodang Japan-i tama ao. Japan ajanga pa kanga kongshia liasü. Japan nung nung dak linük meimba shisatsü, temelung lemtetba aser merükmejuba atema pai Japan tenüngsanga liasü," ta metetdaksü.

Quad lenirtem senden nung adentsü atema tang Modi Japan yimtiba, Tokyo nung oa lir. Quad senden nung pai United States, Australia aser Japan nungi

lenirtem den külemi shilem agitsü aser linüktem tsungda jurila senden amentsü.

Japan nung aliba India nung den jembidang Modi-i linük ana tsungda terenlok tsütsü tesendaktep junga aliba metetdaksü.

Modi-i, "Japan ya asenok capacity building nung tongtiband partner ka lir. Japan aser India na amalitep tatishitsü tajung rongnung Mumbai-Ahmedabad High Speed Rail, Delhi-Mumbai Industrial Corridor aser Dedicated Freight Corridor densema lir," ta metetdaksü.

Modi-isa taoba mapang pai Japan semdangba mapang tatalokbatem lemsatepa, "Kodangsa ni Japan semdangdir nenoki kü dang temeim ano taliba sayur. Nenok aika küm aika yangi (Japan nung) lia arudar, aser nenok taküm nung Japan nung oshi, sobaliba aser chiyungtsütemji nenok shilem ka kümogo," ta ashi.

Vivekanand tetshia Modi-isa Japan nung lanurtem dang pei akümüli nung khenbosa India semdangang, ta ajungshia liasü.

Modi-i, "Japan ajanga ajungmesoa Swami Vivekanand-i, India nung lanurtemi pei akümüli nung Japan khenbosa semdangtsüla ta jembia liasü. Swami-i jembiba ama ni-a Japan nung lanur ajak dang pei akümüli nung khenbosa India semdangtsü ajungshir," ta metetdaksü.

Japan nung aliba India sensotem majurudang Modi-i Softbank nungi Masayoshi Son aser Suzuki Motor Corp nungi Osamu Suzuki na densema Japan nung business lenirtem aika ajurua India nung sector balala nung sen indoka inyaksü maongka lemsatepa liasü.

Modi-i Quad senden nung adenba den külemi US Tir, Joe Biden, Japan Ato kilonser, Fumio Kishida aser Australia Ato kilonser tasenba, Anthony Albanese nung den jurila senden amentsü.

BJP yimsüsüba ya Adolf Hitler yimsüsüba den tamajungba: Mamata

Kolkata, May 23 (Agencies): Union sorkari state tem inyakim nung teka aita amushitsü atema central agencies amshir, ta aija Hombarnü West Bengal Chief Minister, Mamata Banerjee-i, BJP-i aniba sorkari linük federal inyakim raksatsür, ta metetdaksü.

Kolkata nung osangbenertem senden ka nung

jembidang Trinamool Congress (TMC) tongti, Mamata-i, "BJP yimsüsüba ya Adolf Hitler, Joseph Stalin mesüra Benito Mussolini nung yimsüsüba den tamajungba," ta ashi.

Laisa, democracy kümzüksü atema central agencies nem nija tashi agütsütsüla, ta ashi.

"BJP-i aniba central sorkari state tem inyakim nung teka

amouktsü atema central agencies to amshir. Parnoki linük federal inyakim raksatsür. Tang Tughlaqi yimsüsüba benoka lir," ta Mamata Banerjee-isa metetdaksü.

"Item agencies nem jurila tashi agütsütsüla, aser yimtenren tsütsü nungi kecha tetsükdaksü makai inyaksü atema melatsüla," ta laisa shisem.

Karnataka assembly election atema Priyanka-i nübo yimtsütsü

Bengaluru/Delhi, May 23 (Agencies): Hombarnü Karnataka Congress Tir, D K Shivakumar-i, Congress General Secretary, Priyanka Gandhi Vadra-i sangküm Karnataka state assembly election atema state nung amongtsü aser nübo yimtsütsü atema melungogo, ta metetdaksü.

Karnataka Congress Tir, Shivakumar aser Congress Legislature party lenir, Siddaramaiah na tsungda mangatetep adoka lir, ta osang prokba mapang nung Shivakumar-i Delhi semdang.

Shivakumar-i, party nungdak atema pa Delhi-i aru aser MLC election atema candidate tem tatembangsüa shimtsü, ta metetdaksü.

June 3 nü Karnataka Legislative Council nung menden tenet election atema nomination file asütsü atema tanü ya tatembangbuba anogo lir saka state nung tongti party asempronglai (Congress, BJP aser JD(S)) tang tashi candidates mesangdong.

New Delhi nung osangbenertem den jembidang Shivakumar-i, "Onoki la dang elections (assembly election) mapang nung la state nung amongtsüla ta shiogo aser lai-a melungogo. Lai state nung nübo yimtsütsü. Rajya Sabha ticket atemabo kecha mejembi," ta metetdaksü.

Shivakua densema Karnataka Congress lenirtem kari June 10 nü Rajya Sabha election nung Priyanka Gandhi toktepdaksüner ta jembidar.

Shivakumar aser taoba mapang Chief Minister, Siddaramaiah nati MLC election atema candidates list bangdak lenirtem nem agütsüogo aser parnoki candidates tatemsa shimtsü.

June 14 nü züngsem tenet kümsük abensatsü aliba ajanga item menden azüngteta election agitsüsa akümer. MLC temji - BJP nungi Laxman Sangappa Savadi aser Lahar Singh Siroya na; Congress nungi Ramappa Timmapur, Allum Veerabhadrappe aser Veena Achaiah S nung aser JD(S) nungi H M Ramesha Gowda aser Narayana Swamy K V nung kümsük abensaba ajanga MLCs elections ayongzüker.

Party lenir aser taoba mapang minister, S R Patil Rajya Sabha election atema candidate shimtsü asü?, ta asüngdangba langzüdang Shivakumar-i, "Pa atema party-i telemtetba agitsü. Tawa party 'Chintan Shivir' senden nung, temaba nungi tsünglanglen tashi nung tasenpurtem nem maongka agütsütsü telemtetba agiogo, anungji lenla ajungalen nungi asadanga sülen bangdak lenirtemi telemtetba agitsü," ta metetdaksü.



Patiala, May 23, 2022: Tang Patiala Central jail nung alisang, Congress Party lenir, Navjot Sidhu Hombarnü Rajindra hospital nung medical check-up agiba sülen meyipa aodang tangokba noksa nung angur.

Mysuru nung PM Modi leniba nung Intl' Day Of Yoga amongtsü

New Delhi, May 23 (Agencies): June 21, 2022 nü Mysuru nung Ato kilonser, Narendra Modi leniba nung International Day of Yoga amongtsü.

Tesüiba küm ana tashi coronavirus wara aliba ajanga International Day of Yoga ya junga memongteti aruogo.

Tang linük nung 'Azadi Ka Amrit Mahotsav' amongba mapang nung Yoga anogomong ya linük nung kanga tongtiband tesem 75 nung amongtsü, ta Hombarnü Ayush Union Minister, Sarbananda Sonowal-i metetdaksü.

International Day of Yoga atongtsü anogo 25 dang lia May 27 nü Hyderabad nunga Yoga indang sentong tuluka ayongzüka nisung 10,000-i

shilem agitsü. May 2 nüa Shivdol nung Yoga sentong tulu ayongzüka liasü aser April 7 nüa New Delhi nung aliba Red Fort nung sentong tuluka ayongzüka agiogo.

Taküm International Day of Yoga tongti sentongji Mysuru nung agitsü aser June 21 nüa Yoga streaming sentong Guardian Ring agitsü.

Iba sentong ya Japan nung anepdang 6:00 ako nung tenzüksü aser New Zealand nung tembangtsü, ta Sonowal-i metetdaksü.

Relay sentong Guardian Ring nungji linük 70 dak temai shilem agitsü aser item sentong nung Union minister tem, film actor tem, saisapongertem, Yoga mongintem aser tejangrartemi shilem agitsü.



May 23, 2022 nü New Delhi nung Haj 2022 Deputationists atema training tenzüksüba sentong nung Union Minister for Minority Affairs, Mukhtar Abbas Naqvi adenba noksa nung angur.

Acoustic Club-i 'About Us' atema concert ayongzüksü

SÜR KÜM KA AJUNGBA ANOGO 22.05.2022



Hotel Morashen, Wokha nung press conference agiba mapang Acoustic Club puri 'About Us' band atema concert ayongzüksü jembiba noksa nung angur.

Wokha, Monupii/May 23, 2022 (TYO): Wokha nung amenoka aliba Acoustic Club-i "ABOUT US" band atema concert ka achayangtsü. About Us pur promotional tour shilem ama Acoustic Club-i iba concert ayongzüksü aser June 03, 2022 nungi iba concert tenzüksü, ta sangdong ka ajanga metetdaksü.

About Us band indang kanga dang yongya ataba concert ya Tiya Hall, Wokha nung June 03, 2022 nikongdang 5:00 nungi tenzüksü, ta Hombarnü Hotel Morashen, Wokha nung press conference agiba mapang Acoustic Club President Nzanbemo Patton-i metetdaksü.

Patton-i, iba ya concert ka dang masü, saka music luyim nung renlokba aser jenjang ka ajangzükteba indang benjungmung ka lir, ta ashi.

District Administration, Wokha den longjemer tongti tayonger ama Deputy Commissioner Orenthung Lotha aser Sr. PS to Deputy Chief Minister, Hachio Patton, shibai iba sentong sponsor asütsü, pa tongti tesemdang

ama iba sentong ayongzüksü, ta ashi.

Iba concert agiba mapang 'About Us' band pur nem teningsang agütsütsü aser concert atema partners tem - Aisle Sound Force and Lights-Audio Gears, Tsungiki Student's Union, Gracious event Planners, Hotel Morashen, Wokha, Video production partners (Darius & Ryan production studio), Achano Tungoe Photography, Ete Coffee-(gallery ticket alirtem atema special coffee agütsütsü), Naga Traditional Corner-Api Yanthan aser tanga individual sponsors aika dena lir.

Supporting act ama, iba concert nung arishi küm 7 tain guitarist Giedion Kithan-i shilem agiba angutsü.

Ticket jenjang sen 300/-, sen 500/- aser sen 1000/- asütsü aser ticket ya police point Wokha (Tiya Hall Wokha) anasa Wokha Village Wothok Ki - Bravo School of Music nung angutsü. Tiya Hall Wokha nung nisung 1500 shi mentetter aser iba show repringtsü atema terepranger aika arutsü imlar.

Iba sentong temaba jenjang nung agütsü aser

tereprangertem (audience) nem 'sounds & lights' tajungba ajangshidaksütsü asoshi, ken balala atenba dak alaka, concert tayongertemi technical partners, Live Sound Production, aser lighting design tem amshitsü asalentong yangludar.

Acoustic Club Wokha puri iba ama concert sentong tulu tanaben ayonger asütsü. 2021 küm TaFMA den longjemer Acoustic Club-i Doyang nung "Doyang Rhythms- Music by the Lake" mezüing ayongzükä liasü.

Maneni, aruya aliba concert sentong nung About Us band-i ken 13 nungi 18 tashi atentsü imlar aser item ken ya parnoki mejemba ken asütsü. About Us nung züngsem tasen Yanithung-i drummer ama band den külemi sabang nung mezüing shilem agiba angutsü.

Tawa, About Us band puri Italy nung amenoka aliba Frontier Records den contract ka sign süogo aser Japan tour atema parnoki mejemba ken nungi acoustic version ka renemdar, ta kasa sangdong ajanga ashi.



Asür Temjensola (Longkong)

Kanga menungra bilemteter. Tanü na onok den meliaka nü temeim senti o tajung onok mulungjang nung lir, kenü anogo asenok ajak Yisu tsüngdang ajuruteptsü.

~ Temeim Kinungbo, Chirnurtem, Kinungertem, Anükapang aser Semchirtem.

Menungra Bilemteter



Asür Aomeren Lemtur
24/05/2020

Temeim oba, nai onok toktsür orr tanü küm ana (2) ajangba anogo nung onoki na menungra bilemteter.

Na onok den meliaka na teti tepeladak lir ta onok mulung süngzükter. Ne temeim aser ne mapatem onoki teti bilemteter. Tanü iba anogo na bilemteta sarasadema amunger.

Nü temeim kinungtsü, jala jabaso aser kinungertem.

Office of the

Aoli Pongen Mungdang

H.Q. Mokokchung: 798601: Nagaland

Website: www.aolipongen; E-mail: aolipongen@gmail.com

SANGDONGER

Anogo : 27/05/2022 Mapang : 10: 00 AM

Tesentepdak : K. Rongsen, Kimen

Aoli Pongen Mungdang kübok shimteta aliba Executive/Lipok Otsü/Chungliyimti Aruju Construction Committee ajak meeting alitsü. Anungji Unit/yimtsüing ajak nungi agüja aliba anogo aser mapang shitak nung absent mesüi arua atentsü metetdaksür.

Iba sangdong dak alaka danga shity meyoktsü.

Sd/-
Sakuwati Pongen
President, APM
H.Q. Mokokchung

Sd/-
Kilenrangba Pongen
General Secretary, APM
H.Q. Mokokchung

State Nodal ketdangsürtemi Phek semdang

Kohima, Monupii/May 23, 2022 (TYO): Joint Director (ATMA) Dr. I. Amenla-i anir Directorate of Agriculture nungi State Nodal Office ketdangsür team kati May 18 nungi 19, 2022 anogo tashi Phek district semdanga liasü, ta sangdong ka ajanga metetdaksü.

ATMA kübok Concurrent Monitoring & Evaluation aser department kübok mapa küma inyakba tanga scheme sentong, inyakyimtem aser tang alu nung metsü/tsünüsembongtsü balala yokba maparen asadangshitsü atema team-i Phek district semdang.

Team-i Pfutsero nung KVK Porba, Persimon Farm School (Lekromi village) aser Banana Farm School (Phek Basa village) semdang aser parnoki tetsür SHGs balala den sensaksema liasü, kong telok balalai timtem aser takok ajangshiba otsü lemsatsep.



Changtongya Laishir Telongjem 22 buba fellowship May 20-22, 2022 CBC nung kanga takok ngua mungogo. Iba mungdang nung laishirtem tesem balala nungi kanga medema adenshia munga liasu ta CLT Tir Rev. I. Wati Jamir pastor ajanga metetdaksü. Sentong nung adenertem noksa nung angur.



NATIONALIST DEMOCRATIC PROGRESSIVE PARTY

"Facta Non Verba"

Regd. No. 56/22/2017-17/PPS-I
21 Tuli Assembly Constituency

SANGDONGER

21 Tuli Assembly Constituency kübok NDPP unit ajak nungi office bearers aser Executive members ajak May 22, 2022 anogo nung adenshia senden amendang, item telemtetba ya agiogo :

1. NDPP telok tashi itshidaksütsü atema Hon'ble Chief minister, Wb.Neiphu Rio aser NDPP tir Wb.Chingwang Konyak nati meranga inyakba ajanga NPF MLA 21 tashi NDPP teloki anir arutetba asoshi tena dang pelaba zülüoka ayur. Iba jagi lenisüba tashi itdaksür aser government maparen tipdema bener otettsü.
2. 21 Tuli Assembly Constituency nung NDPP tashi itshidakja yaritsü atema shirnoksa NDPP nung denogo , parnok ajak pelaa agizükter aser tetenzük nung tanü tashi 21 Tuli A/C nung NDPP atema Wb.J.I.Yadeni bendanga agüja inyakba mapatem asoshi kanga pelaba metetdaksür.
3. Kasa senden nungsa, taruba Nagaland general assembly election nung 21 Tuli A/C nungi NDPP candidate asütsü atema nisung ajaki mulunga Wb.J.I.Yaden yaritsü shimtetba osang metetdaksür.

(T. Meyitiba Lkr)
President
NDPP 21 Tuli A/C

(Imtisunep)
Gen. Secretary
NDPP 21 Tuli A/C

1st Kohima Super Cup: Barak FC aser Aphuyemi FC nati takok angu



1st Kohima Super Cup asayamung nung Barak FC aser A Yhome FC asayar tsungda ball raktepba noksa nung angur.

Kohima, Monupii/May 23, 2022 (TYO): Indra Gandhi Stadium kübok tasayadak aliba Kohima Super Cup football asayamung nung Barak Football Club aser Aphuyemi FC nati pei pei tata league quarter final match takok nguogo. Kohima Town Club (KTC) ajanga iba asayamung ayongzüker.

Hombarnü, mezüing match nung Barak FC-i goal 5-1 agi A. Yhome FC tsükdaktsü.

Team ana tsungda iba match tenzüker minute 7buba nung Barak atema Elminhau-i mezüing goal inoktsü. Mezüing half atemtsü lia, Samson Konyak-i Barak atema goal tanabuba bendenloksü.

Break sülen, tanabuba half nung Yhome FC atema

Vilhoubituo-i minute 50buba nung goal ka inokja liasü. Barak atema Baoringdao Bodo-i 66buba nung goal tasembuba inoktsü aser iba match tatemlen minute 84 aser 90buba nung Aloumei aser H. Minglu nati Barak atema goal pezübuba aser pungobuba idaktsü.

Kasa asayamung match tanabuba nung Aphuyemi FC-i goal 3-1 agi Magdaline Coaching FC pur tsükdaktsü.

Taoba hopta match ka nung otsüsüsüsa Naga Brothers FC madak goal 21 agi takok anguba sülen, Hombarnü match mezüing half tashi Aphuyemi FC aser Magdaline Coaching FC nati goal ka danga meinoktsüet.

Tanabuba half nung, Magdaline Coaching FC atema

Dupisa Pucho-i minute 50buba nung mezüing goal inoktsü. Minute 72buba nung Aphuyemi FC puri penalty ka metsütsü maongka ngua Lironthung Lotha-i iba penlaty idaktsü.

Minute 4 sülen, Magdaline Coaching FC nungi defender Vikhosa Dul-i mekümdangi par telok indang nung goal inoktsüba ajanga, tiaka Aphuyemi FC puri goal talila ka angu. Iba match atemtsü minute 2 lia K Thopi-i Aphuyemi FC atema goal tasembuba inoktsü.

Mongolbar (24.05.2022) atema match tem yamai alitsü:

1. G Sports FC vs Hurrricane Boys, Phesama @11:30 am
2. Sechü FC Academy vs New Market FC @1:30 pm

South Africa tour nung Marizanne aser Lizelle masayatsü

New Delhi, Monupii/May 23, 2022 (TYO): June ita South Africa team pur Ireland tour nung asayar tejen all-rounder Marizanne Kapp aser batter takotet Lizelle Lee nati shilem magitsü.

Lee, Kapp aser wicketkeeper-batter Sinalo Jafta nunger temang nung timtem (respiratory illness) aliba ajanga iba tour nung masayatsü. All-rounder arishi küm 24 Delmi Tucker-i World Cup New Zealand nung shilem magi, saka Ireland tour atema South Africa squad nung la anisemogo.

Tan season white-ball format nung Six Gun Grill Western Province atema Tucker-i run 409 yanglu aser wicket 15 agia liasü. Top-order batter Andrie Steyn, spinner Raisibe Ntozakhe aser bowling all-rounder Nadine de Klerk, shirnok World Cup nung reserve player ama aniok, taruba tour atema par asemprongla squad nung denogo.

Dane van Niekerk-i World Cup nung shilem magi aser taoba mapang yirur aliba nungi la taneptsü mangu lir. Fast bowler Masabata Klaas-a tapubang nung timtem aliba ajanga squad nung maniok.

"Ireland series atema shimba squad dak temulung alemer. Telok nung asayar tasen kar anisemba ajanga asayar ajak nem maongka agütsür aser ibajagi parnok kanga nungittsü. World Cup asayamung nung asayar kari shilem magitet aser parnok jenjang yanglushitsü atema aruya aliba tour ya maongka



Marizanne Kapp



Lizelle Lee

tulu asütsü," ta Convenor of Selectors, Clinton du Preez-i ashi.

Pembroke Cricket Club, Dublin nung June 3 nungi June 8, 2022 tashi team ana tsungda match asem T20I series asayatsü terenemba lir. Iba sülen, Castle Avenue, Dublin nung kasa team anaprongla ODIs asem asayatsü.

Ireland Tour atema South Africa Squad:

Anneke Bosch, Tazmin Brits, Trisha Chetty, Nadine de Klerk, Lara Goodall, Shabnim Ismail, Ayabonga Khaka, Sune Luus, Nonkululeko Mlaba, Raisibe Ntozakhe, Tumi Sekhukhune, Andrie Steyn, Chloe Tryon, Delmi Tucker, Laura Wolvaardt

French Open: 2022: Iga Swiatek tanabuba round-i iogo

Paris, Monupii/May 23, 2022 (Agencies): Hombarnü, Phillippe-Chatrier kübok tetsür kija French Open mezüing round nung Iga Swiatek-i Ukraine tsür Lesia Tsurenko madak 6-2, 6-0 agi takok ngua iba asayamung tanabuba round-i iogo.

Arishi küm 20 tain aser world No.1 Swiatek-i Roland Garros nung French Open akoktsü ama ajaki imlaa atadar.

Iba match tenzükli dang Swiatek-i Lesia amokbanger asaya aser lai ayong ayonga dang mezüing set koktet.

Poland tsür Swiatek-i winner' 20 aser Lesia-i 3 angu. Tanabuba round nung Lesia-i point ka danga mengutet. Kasa mapang, Swiatek-i unforced errors' 13 angu, saka Lesia dang nungi lai winner' timba anguba yong la ajatetta asayatsü maongka angu.

Iba asayamung mezüing round densema Swiatek-i match 29buba atonga takok angur asütsü.

Italian Open, Stuttgart Open, Miami Open, Qatar Open aser Indian Wells Masters takok anguba sülen, Swiatek-i French Open nung shilem agidar.

Tennis asayar tejen Martina Navratilova-i ashiba agi, tawa

tashi Swiatek ama tennis asayar shingai junga asayadanga mali. Clay court nung tasüsa lai kanga junga asayar asünung Roland Garros nung Swiatek tsükdaktsütsü ya kanga tasak asütsü, ta Navratilova-i ashi.

"Tang tashi Swiatek den toktepa tajungba asayatsüsa asayar mali. Lai kanga junga asayadar aser lai tasa/yimya balala meyoktepa asayaba ya jangratemtsüka lir. Swiatek tashiita dang lir aser yamaji lai kanga toktepa asayar. Court mashi ka nung tanga asayartemi la akoktsü tasak asütsü," ta Navratilova-i ashi.

*** Naomi Osaka French Open 2022 nungi tsükogo**

Kasa asayamung, tetsür kija mezüing round match tanga ka nung, pezüben Grand Slam takok angur winner Naomi Osaka French Open nungi tsükogo. Court Suzanne-Lenglen nung tennis star Japan tsür Osaka-i 5-7, 4-6 agi USA tsür Amanda Anisimova makok.

Iba match set anaprongla nung Osaka-i point agitsü maongka angu, saka World No.27 Anisimova-i Osaka nem iba match amokbangtsü maongka magitsü.

Osaka-i unforced errors' 17 aser double faults' 4 anguba sülen, mezüing set koktettsü teimla ajak samadok.

Tanabuba set nung, Osaka-i Anisimova ajateta asayatsü merang, saka Osaka tejkadang ser asayatsü asoshi lai maongka tajungba angu aser iba match koktet.

Iba match nung, Osaka-i unforced errors 29 anguba ajanga lai point angutsü maongka mengutet aser tamakok nung tembang.

2019 küm Osaka-i World No.1 jenjang tongtetta asaya, saka iba küm nungi lai asayamung nung junga shilem magiteti la jenjang raksadok.

2021 küm press Conference nung shilem magiba sülen French Open nungi Osaka tukadok. Iba dak sendakba nung Osaka-i ashiba agi, media den jembiba ajanga kanga shisabuludaktsür.

Media pur den mejembitsü lemtetba sülen, Osaka dang senchi chia liasü.

Osaka-i US Open aser Australian Open anabenben koka lir. Tang, Osaka WTA rating points 1295 asütsü aser la World No.38 nung lir.

Tehran nung Iran indang... (Tapak 8 nungi...)

Iran-i iba mang ayangtsü, ta Tir Ebrahim Raisi-i Hombarnü amokmerenogo.

"Sepai lenirtemi nisung tepseter süoki ia bushitsü ni nenshia ashir aser linük asoshi takum bendanga agütsür indang azü tokshiba mang ayangtsü," ta Raisi-i ashi.

"Iba mapa tamajung nung global arrogance indang teka lir ta ni amanger."

Syrian yimli nung Iran ya mitkar tsütsü teyarir tongtipang ka liasü. Parnoki ISIL (ISIS) telok den raratsü atema sepai meyirijang aika Syria aser Iraq-i yoka liasü.

2010 küm nungi tenzüka Iran nunger scientist aser tazüing-tashir nisung trok tepsetogo aser lendong agütsür ya motorcycle nung arur aser iba ama tatalokba yagi Iran indang nuclear sentong nung tenük

yoker ama ajiteter, koba bomb yanglutsü nükjidong nung lir ta West-i ashir.

Ajisüaka Iran-ibo yimjung maparen asoshi nuclear maparen ya inyaker ta ashir aser par scientist tem tepsetba ya Western intelligence agencies aser Israeli Mossad ajanga kiralongra mapa inyakba lir, ta aitsür. Iba ama taitüba nung Israel-i telangzüba kecha magütsür.

2020 küm January ita United States-i tayimtsü amshia Baghdad indang international airport amakdang Quds Force tekolakba, General Qassem Soleimani tepseta liasü.

Iraq nung Soleimani tepsetba ya White House aser Pentagon-ia jangjatsü aser iba mapang US tir inyaka alisang Donald Trump totuyuba nung amak, ta shia liasü.

BILEMDANGANG

"Chichiba tembaribo mashioktsür saka kümzüker."